

# Sumbangan PM ceriakan 78 anak yatim sambut raya

BERITA HARIAN 04 APR 2024 m/s: 9

Bantuan diperuntukkan khusus bagi kelompok memerlukan

Oleh Muhamad Lokman Khairi  
bhnews@bh.com.my

**Ipoh:** Sebanyak 78 anak yatim di Yayasan Amanah An-Nur Maisarah di Parlimen Tambun di sini, terharu menerima sumbangan tunai Aidilfitri daripada Perdana Menteri, Datuk Seri Anwar Ibrahim menerusi Setiausaha Politiknya, Muhammad Kamil Abdul Munim, malam kelmarin.

Muhammad Kamil berkata, sumbangan itu diharap dapat menceriaikan anak yatim terbahit menyambut Aidilfitri tidak lama lagi, sekali gus dapat mengurangkan beban kewangan membuat persediaan menyambut lebaran.

“Sumbangan ini inisiatif dilancarkan Perdana Menteri selaku



Muhammad Kamil menyantuni anak yatim dan asnaf pada Majlis Berbuka Puasa di Rumah Anak Yatim An-Nur Maisarah, Ipoh, kelmarin.

Ahli Parlimen Tambun untuk terus menyantuni penduduk khususnya masyarakat yang menetap di kawasan ini.

“Kita pastikan ada bantuan yang diperuntukkan khusus untuk kelompok yang memerlukan. Contoh hari ini (malam kelmarin), kita ambil kesempatan menyantuni kelompok anak yatim dan asnaf, rumah kebajikan ma-

syarakat dan insya-Allah semua segmen ini tidak akan diketepikan atau disisih,” katanya pada majlis berbuka puasa di sini, malam kelmarin.

Yang turut hadir, Pengerusi Yayasan Amanah, An-Nur Maisarah, Dr Fazillah Nordin.

Pada majlis itu, Muhammad Kamil bagi pihak Perdana Menteri, menyerahkan Kotak Rah-

mah berisi barangan keperluan asas kepada Pengerusi Jawatankuasa Pembangunan dan Keselamatan Kampung (JPKK) Parlimen Tambun.

## Selami permasalahan rakyat

Beliau berkata, sumbangan terbahit sebahagian daripada program Ziarah Kasih MADANI yang bermula tengah hari kelmarin bertujuan menyelami permasalahan rakyat dan berusaha menyelesaikannya.

“Kita bermula sejak tengah hari (kelmarin) bertemu pasukan Jabatan Sukarelawan Malaysia (RELA) di Meru Raya, ada juga Ziarah Kasih MADANI ke 10 rumah sambil menyampaikan sumbangan bagi pihak Perdana Menteri di Meru 2C dan Kampung Dato Ahmad Said Tambunan.

“Selain itu, kita turut menyantuni ketua kampung, JPKK dan menyerahkan sumbangan termasuk Kotak Rahmah serta sumbangan tunai Aidilfitri kepada mereka,” katanya.

Muhammad Kamil berkata, sebanyak 3,000 lagi Kotak Rahmah akan diedarkan kepada penduduk di Parlimen Tambun yang memerlukan melalui ketua kampung.